

**Kitaani ukiukkut aaffanniartarnerup januarip 15.-iat aallarnerfigalugu martsip 15.-iat ilanngullugu ingerlanneqartartussangorlugu Naalakkersuisut Aavernik illersuineq piniarnerlu pillugit Namminersornerullutik Oqartussat nalunaarutaat nr. 20, 27. oktober 2006-imeersoq-p allanngortinneqarnissaannik peqquneqarnissaannik Inatsisartut aalajangiiffigisassaattut siunnersuut**  
(Inatsisartunut ilaasortaq Nikolaj Jeremiassen, Siumut)

**Akissuteqaat**

(Aalisarnermut, Piniarnermut Nunalerinermullu Naalakkersuisoq)

**Siullermeerneqarnera**

Inatsisartunut ilaasortaq Nikolaj Jeremiassen aalajangiiffigisassatut siunnersuuteqarnermini allappoq Sisimiut Attullu avataani ukiukkut aaffanniartarneq aatsaat martsip aallaqqaataani aallartittartoq, taamalu kingusitsigisukkut aallartittarnera ilaatigut piniartunik ulorianartorsiortitsisinnaasartoq, tassami umiatsiaararsortut aaffanniartarnerlu avammungaatsiarsuaq angalasariaqartarneri aarrit ukiup taamaalinerani siku malillugu ungasittumut pereersimasaramik.

Siunnersuuteqartoq tunngavilersuinermini ilaatigut tunngavigivaa Sisimiut Attullu avataani ukiukkut aaffanniartarneq januaarip qeqqaniit aallartittarpat piniartut uloriananginnerusumik aaffanniarsinnaalernissaat taamaalineranimi siku kitaanut qaninnerusumiittarnerarmagu, tamannalu inuiaqatigiit ataatsimut isigalugit aamma imminut illersorsinnaanerussasoq tunngavilersuilluni.

Piffissat aarrit piniagaaffii Aavernik illersuineq piniarnerlu pillugit Namminersornerullutik Oqartussat nalunaarutaat nr. 20, 27. oktober 2006-imeersumi § 3, imm. 3 litra 1 malittarisassiuunneqarnikuvoq 1. martsimiit 30. aprilimut piniagaallutik. Aaveqatigiit marluk sinnerinut piniarneq 1. oktober aallartittarpoq.

Pinngortitaleriffik siusinneruklut akissuteqarnermi uparuaanikuvoq aarrit nuliunerisa nalaat ukiukkut pisarmat, ilisimasarlu pigineqartoq (ilaatigut aamma Kitaaniit) piffissaq nuliunerisa nalaat januarimiit april-ip ingerlanerata tungaanut nalerivaa. Tassalu maannakkut malittarisassat aalajangersarneqarnerat naapertorlugu piniakkat nuliunerisa nalaata naajartorneranni piniagaalereertarput. Aarrit nuliulernerisa nuliunerisalu naajartorneranni akornusersorneqartalissappata, tamanna tunngaviusumik piaqqiornerisa nalaani eqqissisimatinneqarnissaannut akerliussaaq.

Kitaani aaveqatigiinnut uumassusilerisunit siunnersuineq aappasaanik (2009-mi 2014-imilu) pisassiissutit amerlineqarsinnaanerininik aammaassipput. Siunnersuinerup takutippaa Kitaani aaveqatigiit marluk killilersuiffigineqarnerat siunertani malillugu malunniuttoq aaveqatigiillu taakku marluk amerliarsimasut.

Piniarnermut Siunnersuisoqatigiinni aarrit piniagaanerisa siuartinneqarnissaat siusinnerusuklut oqallisiginikuuvaat. Tamanna Kitaani aarrit pillugit KNAPK-mit saaffiginnissut tunngavigalugu pivoq. Piniarnermut Siunnersuisoqatigiit piniagaaffiup 15. Marts aallartittarnera pillugu nassiuuasoqarnissaa kissaatiginikuuvaa. Aalisarnermut, Piniarnermut Nunalerinermullu Naalakkersuisoqarfiup taamanikkut nassuiaasinneqarpoq, qulaani taaneqartutut aarrit nuliunerisa

piaqqiornerisalu naligimmagu piniagaaffia siuartinneqarpat tamanna akornutaassasoq nassuiaatigaa. Kitaani 15. marts aallartittarnera nalunaarutip atuutilerneraniilli atuutilersimavoq.

KNAPK-p siunnersuutip suliarineqarneranut atatillugu tusarniaanermut akissuteqarnermini, allannguisoqassappat allannguisoqartinnagu atuisunik oqaloqatigiinnerit ingerlanneqarnissaat sakkortunerpaamik piumasaraa. Nunap immikkoortuini pissutsit assigiinngillat, assersuutigalugu aaveqatigiit Qeqertarsuup Tunuata avataani piffissami siunnersuutigineqartumi aaffanniartoqarsinnaanngilluinnarmat, aatsaallu siku qupititerluni angallatinik ingerlaarfissanngoraangat tikinneqarsinnaanngortarmata. Allannguisoqassappat KNAPK-mit pissusiviusut eqqartorluaqqaarlugit allannguisoqarnissaa piumasarineqarpoq.

NAMMCO-p februarimi ukiumoortumik ataatsimiinnermini pisarinngitsuukkat tassa piffissami pisassiiviusumi pisassat sinneruttut ukiup tulliani pisassiissutissanut nuunneqarsinnaanerat uumassusilerinikkut tunngasutigut akornutissaqanngitsutut isummerfigaa. Pisassiissutinit pisarinngitsoorneqartunit nuussinermi ukiumiit ukiumut amerleriaat atorneqassanngilaq, taamaallaalli ukiumi pisassiiviusumit pisarinngitsuukkat nuussinermi atorneqassalluni.

Qulaani taaneqartut tunngavigalugit siunnersuut Naalakkersuisut tapersersunngilaat, taamaattorli piniartunik KNAPK-millu suliaq pillugu oqaloqatigiinnerit aallarnisassavai.

Matumuuna Inatsisartunut suliap nanginneqarnissaanut siunnersuut ingerlatippara.